



道園學古錄卷之二十六

歸田集

雍 虞 集 伯生

記

袁州路儒學新建尊經閣記



宜春之為郡在江右上游山川完固神氣休明民生其間務本而力穡志定而用約商賈利欲之誘少都會繁夥之習微尊吏畏法奉命受役斂焉自保政用不煩昔韓文公以文學為治其民不忘至今尸而祝之迨夫故宋盱江李氏之作學記有以極世變之故而風厲之及張宣公記新學朱文公記三賢祠大有以教其人其君子有以成其德其庶民有以從其化休休乎其無斃也然而世之相去漸已遠矣我

國朝以來慎擇牧守豈弟之譽相聞前太守真定張侯宗顏在郡時嚴君仲毅來長其幕作而言曰

國家恩澤至厚也。府公甚賢也。吾民甚易治也。然而鬼神禍福之說勝而閭里之趨向易譎。豈非學校之不脩而藝之無其素也乎。仲毅職在文史。何足以知斯文之事哉。然志之所能力之所及。作新吾民之觀瞻。以定其心志。則不敢不勉焉。如其禮樂。則有俟乎君子矣。乃躬督學賦之入。無敢逋遺。特其師弟子執事者。廩稍之給。而節其浮冗。期年而得錢若干。將大作學宮之事。今太守黃信張侯熙祖以

成廟宿衛之舊。連守名郡。以寬厚治。辨聞其來。茲也。守居簡清。民以寧。壹監郡通守。別駕幕府。各思其職。咸無間言。事有宜爲。順而不撓。學校侯職也。而所以爲諸仲毅者。益得盡其心焉。乃購巨材於故家。取良壁於清庾。作尊經之閣。於講堂之北。若干步。崇基八尺。深四十尺。廣五十尺。楹之崇如深之數。形勢規模之大。丹雘塗塹。塹稱焉。東南學校。建立之。成。吳或

加矣。爲兩廡。以屬諸講堂之左右。作櫺星門于廟門之南。餘屋之適用者。以次而就。自一木一石一工一役。傭估之直。親給以時。不及吏手。如治家事。晝罷之暇。日必至焉。略無風雨之間。以其蒞事之嚴明。施諸斯文之崇重。是以用約而利周。敏成而固。又足以流美於方來也。舊有夫子燕居像。秦而置諸閣。移李氏學記。石刻置堂中。經始於仍。改至元之五年。歲在己卯。四月至八月。而落成。予以過客。得從而觀覽焉。郡長吏以下。授簡俾爲之記。集乃爲之言曰。美哉乎尊經之名閣也。人之於天也。天下之於君也。一家之於其親也。蓋有恒尊矣。上古民淳。朝作夕息。於其所尊。無所違失。由之而不知者。蓋有焉。聖神之出。因天之所示。而示之。猶未著於言也。風氣旣開。人文宣朗。帝王迭作。已不能無不親不遜之憂。盛哉。魏魏乎。成功盛德之大。洋洋乎。文章禮樂之興。斯民也。自得於

天理流行之中有循於日用彝倫之則於其所恒尊何有少慢於恭敬奉持者哉孔子出於羣聖之後當世變之極王者之迹熄斯民之禍起生乎其出者不知天之所與者至重且至重而不可踰也不知君君臣臣父父子子之分不可紊也是以有憂焉而迷作興矣則又因其行事之失而正之以復禮之常使萬世之下因其典籍之所存得以行乎治化是以儒先君子以其功過於堯舜而有罔極之恩焉然則天下萬世之於聖人也書之於經也所由以知尊其所恒尊者也可不尊乎奈何後世之學者誦習文義以爲工不真知其可尊之故異端高妙以爲勝而謬於其所尊之實其憂可勝道哉是學也有諸君子之記言在來遊來觀於斯閣者必有能尊其所當尊者矣豈徒爲瑰奇詭異之觀而已乎

南軒書院新建藏書閣記

袁州路南軒書院者祠廣漢張子宣公而列於學官者也按宋時宣公之弟杓定由守宜春宣公至焉郡人士思宣公而不敢忘也端平丙申郡守廬山彭方度地於東湖之上始創書院又七年而後成該守特爲尚書兵部侍郎記之內附 國朝以來莫之改也近歲水齧其址其藏書之閣圯焉其勢未已講堂且危仍改至元之二年山陰廬陵趙某始至廩然憂之告諸大府請加完緝大府聽其言思有所屬焉慕府之長嚴君仲毅進曰仲毅之在此不可使學校有所遺缺也明年前大守真定張侯宗頤去爲漕今太守廣信張侯熙祖始來同寅協和民以無弊仲毅得以致其力焉然書院之田不足以供祭祀廩稍之用是以營繕有所未遑也乃出月俸爲之先而上下應之即書閣之舊址斷松爲枋沉布水底加西日石焉延十有五丈廣百步崇一丈畚石加土平接講堂

之址凡若干尺。嘗始無慮。是時都學新作。尊經閣書閣之材。尚有堅亮者。以今侯之意。與書院。奠諸新隄之上。復藏書之。舊觀閣。凡三畝。皆出飛簷。以遠風雨。奉宣公之像於閣下。以爲祠。又作東西廡。以屬諸講堂。作詠歸。其與立雪亭對。大門之東。與老氏之宮接。正其界。爲亭以表之。至元五年。某月某日。告成。又作水櫃於上流。以防衝突之。及是役之始。終。嚴君日至。而趙其譯史。鄧其府吏。胡其直學。趙其皆勤敏。數實。竟相其功。屬予記其事。如此。嗟夫。使幕府之佐其長身。任其勞而不辭。則府安有缺事哉。然予不敢徒書其土木之功也。蓋聞之聖人。既遠。周子與焉。作爲圖畫。以發不傳之秘。兩程子繼之。而其道大行。龜山楊氏之歸閩。叔子因歎其道之南矣。其傳諸豫章。延平者得朱子。而張子得於五峯。胡氏者生同時。而學同源也。斯世斯文之所係者重矣。張子以丞相魏公。

之元子。天資粹美。異於常人。自其弱冠。已知求學聖人之道。及得所傳。遠有端緒。察乎幾微。萌動之端。以博極乎求仁之道。玩心神明。不舍晝夜。極講明問辨之功。從容以和而不激。極舒遲溫厚之意。端嚴以正而不阿。朝進暮繹。同歸一致。任重道遠。死而後已。及夫蟬蛻人欲之私。春融天理之妙。其所至盛矣哉。以之事上。蒞民以之。立言垂教。百世之下。學者可考焉。昔在魏公。相思陵於艱難之中。樓屈於險巖之去。大忠大義。時人比之。諸葛武侯。宣公以爲武侯。王佐之才。而自比於管樂。必不然也。取舊傳而更定之。蓋以明其父之心。爲定叟之爲弟也。才略幾有父風。治表之日。宣公閒暇而過之。所以端其爲政之本原。以見諸行事。其民被其德而不知者多矣。當彭守時。其殘虐。既論之。猶存而今不復。可見豈不重可歎哉。遺像儼然。衣冠。色之在於斯也。學者想見其中。和純。

粹之氣洋溢充滿反求諸已知其所不及以自致其變化焉
則固君子之所望也

尼山書院記

尼山書院山長臨川金谿彭璠歸自魯以興復書院始末爲
言乃爲之次第其事云尼山去曲阜東南六十里今屬滕州
鄒縣在滕西百縣鄒東六十里其山五峯西峙中峯則所謂
尼山啓即王夫人顏氏所棲而生聖人者也山皆石其巔多
蒼柏諸小木皆巨葉霜露既降絢如渥丹升降各途升之谷
草木枝葉皆上起降之谷皆下垂無或交矣反刺者其東臨
水崖有曰坤靈之洞洞中有聖人石像與顏母之山對其北
則防山聖人合葬其父母配於書院在其中前有智原之溪
後有中和之壑往昔奉尼山之神而祠之曰毓聖侯其左有
夫子之宮焉故宋慶曆癸未孔子四十六代孫襲文宣公而

兗州仙源縣宗原作新宮有廟有夫子之殿有夫人之修有
講堂有學舍有祭田自是歷宋金至于今蓋二百餘年矣宮
不知以何年廢我國家奄有中夏崇尚孔子之道歲月浸
久典禮斯備至順三年歲壬申五十四代襲封衍聖公思晦
用林朝管勾簡實理言請復尼山祠廟置官師奉祠因蕭璠
可用事聞中書送禮部議奎章大學士康里公燮時爲尚
書力言其事當行議上至元二年丙子中書左丞王公懋德
率同列執政者白丞相置尼山書院以璠爲山長六月至官
爲葺舍山中鑿竭私藁繼以假貸具羊豕爲酒告山之神召
近鄉父老受神賜告以興廢之故明日鄉父老各以其人至
除荆棘撤瓦礫得殿及門之故基諸舍之所在次第而見將
告諸郡縣而經營之山東東西道肅政廉訪司分司寧夏楊
公文書訥行部率其中文崔趙郭趣茲山留璠舍一日簡瞻徘徊

細以其事爲己任命同知滕州事郝寶問領之首出俸以爲之先而監州李彥博鄒縣令張士兼與郡邑之官屬凡齊魯之境與賢士鄉大夫民之好事者大出錢而勤成之擇木於山陶甃於野備儉致遠率車牛服身役連軫載途飲餉相望役大而民不知勞又得古殿遺構之成材於魯之故家尤稱巨麗不數月而大殿成殿門成毓聖侯之祠成學宮在廟之西放國子監制也作觀川亭於坤靈洞之上相傳以爲夫子之在川上蓋在此云繼以湖志繪聖賢之像成樂器祭器以次成置弟子員以凡民之子弟俊秀充之皆復其力役乃以明年之上下用太牢致祠告成噫其功可謂敏矣夫朝廷定議於上部使者有司宣力於下以克有成聖明在上文運宣通於斯可徵焉烏米古初開物天作茲山太和氤氳元氣融結流形降神篤生大聖以立三極位天地

育萬物與日月四時貫通於無窮若夫徂徠龜蒙至于岱宗雨露風霆往來復前瞻後際邈然高深其孰可測哉運會有時聿奠新宇不日之成豈偶然與璫也得以學宮從事於茲可謂榮矣集老且病舊學荒落僅克識其梗槩如此若夫播爲聲詩歌誦功德式薦明享勒之金石則有待於方今儒林之君子也哉

重修張巖書院記

宜春萬載縣獲富里有故臨江儒學教授千崖張君某世居之嘗得山水泉石之勝於其南作亭榭園池廣袤數里青山趙君文記之言其奇偉華麗擬於京洛吳越傳聞者如見繪畫所謂張巖書院者在山之麓有禮殿以祠先聖殿有門廡有祠以奉周程張邵司馬六君子有樓以藏聖賢之書有堂以尊師而講學有四齋以居其學者有庖廩器具以給凡用

此又趙君歎其誦詩讀書之美而擬諸廬阜衡嶽之所有者也千厓君歎其孫出仕京師弗違于茲者且四十年萍鄉榮君南祥娶張氏則千厓君之子之女子也有子岳孫既長而有立稟于其親而請諸舅氏疇願因書院之舊而加葺之以延師取友率其族人鄉黨子弟而就學於斯也舅氏曰是吾意也岳孫乃以元統乙亥之春鳩工庀徒致其繕治易朽以堅飾黯以華割腴田以具食其舅氏又資之以推蘓之山藝蔬之圃不數月而成且備矣十有二月岳孫與巖學之士傳君任來求文以記之夫南山張氏之亭館甚多而岳孫獨先事於書院觀其志之所存可謂知本者矣宜春在江右之上游其風土淳厚其人易與爲善西瞻衡岳則岳麓書院在焉東望廬阜則白鹿洞在焉此昔賢之所經營皆依乎名山大川者也今巖學得山水之秀故可托以久長者乎今天下好

事者築室買田以資講習然一列於學官則行有司之事而絃誦謦苴殆爲文具者多矣獨巖學違於城闕之喧囂邈乎公府之拘制饋餉時至無乏絕之慮人迹在邇無岑寂之苦息焉游焉無所事乎其外及其閒暇可以登高眺遠而發揮其詠歌環千里而觀之爲學之善地未有過之者矣雖然樂順適則志易墮之磨礪則德每孤前輩寥落師友道廢遺言之微孰究孰擴趨時尚者竊緒餘以釣利祿務高虛者假近似以立名聲疏鹵自欺之風有不可深言者宜春文物之邦深山茂林豈無古學之士經明行脩足爲師表者張巖之人其力致之也乎爲賢者之未易致也則岳麓白鹿洞晦菴朱子南軒張子之成規緒論在焉宜取而表之相與尊信而從事焉可也尊信則不搖於異議從事則馴至於成功他日衣冠之盛彬彬然自巖學而出則張氏榮氏之名顯著於天下

豈直山水光華而已哉仍改至元之元年十一月自營盧集
記

袁州路萬載縣重修宣聖廟學記

萬載縣尹懷孟馮士毅縣學教諭匡廬曹邦來告於集曰學
校之繫於治化大矣風紀之司以爲職任部使者巡行郡縣
下車即理廟學以爲先務而士毅等滿首於此謹廟祀繕學
舍以待教令不敢緩也茲邑之學始作故宋至和中屢遷不
常季年始定于水西內附 國朝因舊無改越五十餘年至
治辛酉之歲僉憲薩德彌失至縣以其規模敝陋弗稱而學
計不足以給用用父老言命縣尹河南張輔延見邑人江州
權茶大使黃璧咨以脩學之事璧承命以爲已任禮殿小不
足以容祭器樂懸之設進退拜立之位爲四楹之屋於殿南
深丈有八尺廣與殿等以兩廡之迫於左右也移而廣之丈

有五尺濶其門而南之凡三丈有二尺又移櫺星門於門之
南三丈有五尺皆更作焉講堂齋舍官廳厨屋加葺焉事具
郡人前進士夏鎮記又十年爲至慎辛未僉憲聶公延世至
以先聖先師及從祀之像設弗嚴知薩公之用人也審又以
咨之黃君受命如初不三日而像設之冕烏裳衣五采絳繡
如章又八年爲仍改至元之四年今副憲完顏公至適殿棟
橈前後營之交承雷池壞仍薩公聶公之意咨請黃君受命
亦如之明年陶礬材木具作虛屋架其上以通水節以文瓦
建以鴟尾而殿益高以固完矣凡二役二使者一以屬黃君
不資於衆人不煩於官府材木之直工役之傭一出於私帑
故無所會是以臬司公府標以善士之目焉敢請記之蓋聞
之舉直錯諸枉則民服舉枉錯諸直則民不服施諸天下郡
國其道一也又曰魯無君子者斯焉取斯昔人以爲稱人之

善必本於父兄也。司民風者，將有爲焉，豈乏材用之供哉？而審人以托之，不以類煩一士爲嫌者，誠有教行乎其間也。取諸父子昆弟之無間言者，所以興孝弟也。取諸謹愿無干於官府者，所以別善良也。取諸樂易而無所厭者，所以敦鄙薄也。取諸敏事而不乏者，所以懲驕吝也。鄉黨州閭之衆庶見而感焉，則驕吝鄙薄之風消，善良之類盛，孝弟之道興，而使者之教行矣。尚何憂學校之不修乎？乃若嚴經傳之誦說，以爲學，則尚廉恥敦厚，以閑士習，出其俊秀而表之，勗其所未至，簡其所未率，則有司之教猶有可爲者焉。縣令學官勉之，仍改至元之五年秋八月，具官盧某記。

南康路都昌縣重修儒學記

皇朝自國都郡縣皆建學，學必有廟，以祠先聖先師，而學所以學其學也。有司奉明詔嚴祀典，而屬教于校，官簿海內

外莫敢不虔敬，苟有事焉，則必記其事，事無不同也。記事者，因其地而各有所述，以示調勸。此南康都昌之脩學所以不可無記也。昔者孟子沒而道學失其傳，周子起於千載之下而傳之程子，而斯道大明，以行聖經賢傳之旨，論說傳受之備，至朱子而茂有加矣。而南康之爲郡也，蕞爾湖山之間，甫及百年，周子朱子爲之守其化民之速，入人之深，豈他郡之所可及哉？且都昌之爲邑，俗尤淳厚，黃灝彭鳳馮椅曹興宗四君子者，實從朱子遊，講學之懿脩行之篤，傳諸其家，以及其鄉之人者，盡宋之季年衣冠相尚，猶有可考者。冰我皇元之治，昔又七十餘年矣。今縣令豫章于友信以爲其曾大父嘗及朱子之門，而邑教訓清，江宋剏以爲一官五年，懼無以自見於學校，相與悉力于廟學功成之日，使來求文以記之。按郡志學始建于唐咸通中，宋因之，建炎之後更作者

皆有記可考內附以來爲大改作禮殿講臺最真而已其門庶諸
舍責成衆力是以不能堅久其可書者惟泰定丙寅縣令中
山段完澤教諭宋守正爲垣以環宮鑄銅爲祭器燕器與增
置水田二十七畝耳及釗與于令先後至以仍改至元丁丑
之歲始謀修學謹簿書之出納粟必至庾錢必至庫民無敢
隱吏無敢私根括地利之沒于民間者而彭氏之子孫喜學
校之有興也其割其私田貳頃以益學賦將有所興作以歲
歉未克二年之間祭祀之用師弟子之廩稍旣具會其羨得
二百五十餘石爲中統鈔六千餘貫買株栢之木于旁邑以
巳卯之歲七月經始自禮殿殿門及明倫之堂先賢之祠諸
生講肄之舍下至庖庖凡梁棟梁桶一物之旣朽一木之不
堪皆悉撤而更以良美之材覆宇堅密締構高壯異可以經
久焉外三門橈朽甚不堪觀美易以桓植築治垣墉益厚周

密儼然有不可踰之執焉成以其年十一月予旣爲記其事
如此而竊有歎焉宋字立朝之日少其臨民於外者惟南康
長沙漳州爲三耳漳潭皆不及其月獨南康幾三載而荒政
之行都昌之民爲厚講誦之益都昌之士爲深

世祖皇帝時許文正公實得朱子之書而表章之而其言遂
衣被于天下然而遠域窮鄉執其書而無師友之辨功利進
取之士竊其緒餘以干時樂爲簡易之說者而智不足以及
其高明姑竊其名以文其虛誕鹵莽而不可與入聖賢之域
則吾安得不有望於是邦是邑邪嗟夫朱子之教人也豈有
他哉其性仁義禮智也其倫則君臣父子夫婦兄弟朋友也
其書易書詩春秋也其學則顏曾思孟之得於孔子而周子
程子起而傳之者也於是乎識察乎問學之傳致驗乎躬行
之實本乎心得以立言端其統緒以致辨論說之精詳而不

可厭也憂患之深遠而不可忽也千言萬語其在方無所謂
憂之也深故其言之也切其慮之也遠故其說之也詳其不
在茲乎所患世之學者不能篤信其師說而質之凡近者雖
讀其書而不能有所信粗有才氣者又務為新奇以欺世其
亦未如之何也已哉噫弟子之受命莫信於父兄父兄之成
德莫信於師友邑之君子信其父兄之言信其師友之教以
推至于聖賢之德業必無他岐矣邑之君子勉之哉仍改至
元之五年庚辰四月庚某記

瑞昌蔡氏義學記

九江瑞昌有作義學者其一人蔡季霖也季霖沒其子士仁
等脩其屋室贍其供給延名師進宗族鄉黨而教之如其父
時不敢廢來求書其事以示後來者自朱文公講學白鹿洞
環匡廬山之麓士君子聞風而起者多矣其在德安則有蔡

元思其在瑞昌則有周姓弼與其從弟身仲孫子仍在都昌
則有彭巖之皆卓然為高第弟子而元思事文公最久辨疑
答問必悟徹實踐而後已文公沒心喪三年又以事文公者
事黃直卿而卒業焉其晚也與貧同門之友數人每季月一
集以相切磋又如此者三十年而鄉都州間父兄子弟
相與服行其化庶幾鄒魯之感矣宋之季年郡縣學教其士
子以科舉之業相尚本之則無有之也識者憂之或即先儒
之遺迹或因山水之名勝則為精舍以勵學古之士焉澹泊
堅篤無利欲之感是以朱氏之學行於當世而九江南康之
間如蔡周諸君子得以化成於其鄉也我

國家始置進士舉必欲學者深通朱氏論語大學中庸孟子
之說而五經之傳一有定論蓋將仗其人專心竭力於此焉
苟有以深察其味而極造其旨必幡然而悟惕然而思有

以靜存動察如所問所知而用工焉則其人有不爲聖賢之歸而足爲世用者乎惜乎或假其言以僥倖一策而遂視之不啻如筌蹄此不惟上負國家又負聖賢而其日晷月弃亦已甚矣人下也緣黨洋術序之義建學延師於其家父子兄弟相承而無盛衰且故知文公之爲教元思舜禹之流風遺俗之猶有存者豈不盛哉雖然宮室不患不尊也像設不患不嚴也食飲居處不患不足也必得師焉端其所以爲教則存乎其人而已端之之道如何哉因夫鄉之父兄若元思舜禹之所嚮以達宋氏之學溯濂洛而求之非聖人之言不言也非聖人之學不學也辨似是之非決義利之制斷然不爲小人之歸必趨君子之域按其師說循序而進勿雜勿怠終始而無愧焉及其成也舉而措之事業不可勝用也然則堯舜三代之治有不在於今日乎

屏山書院記

建寧路新作屏山書院者祠屏山先生劉文靖公而始列於學官者也先生諱子翬字彥沖故宋忠顯公諱幹之季子而樞密忠肅公珙之從父與爲友者籍溪胡公原仲受學於其門者徽國朱文公也先生居崇安之五夫里有屏山書院文公之所題也

國朝至大忠肅公之五世孫請於郡以樞密故地爲書院取文公五夫里之題扁而揭之第有先生之祠以文公及其從子樞密侑食郡人士春秋具祠不廢而未建學立官如書院之制也元統初郡守暗都刺上其事以請貳憲李公端以爲宜如郡言事聞朝廷至元己卯文書下如其請僉憲左公谷刺失里行部至郡用朱所言取建安書院計餘賦之留郡者爲至元鈔一百五十定以作書院是歲僅以其錢五分

一、以真先生之祠堂他未遑也。至正元年，貳憲幹公王倫徒之。至與郡守麻合馬通守劉伯顏計貲而新之，作禮殿奉夫子燕居先生之祠，侑食者無所改，而都宮有門，凡書院之所宜爲次第而舉之矣。前代之世家故宅，淪謝於二百年之後者，一旦煥然復爲禮樂之宮。自學者至於道塗之人，莫不感嘆而興起焉。歲十有一月，告成郡長貳爲文書使郡人朱所走臨川山中，致幹公之意，使集書其事如此云。所文公之五世孫也。集既書其事而嘆曰：嗚呼！先生遠矣！先生之學之精微，猶可得而聞者，其在文公之所叙錄乎？且其遺文二十卷者，文公之所定錄，而胡公之所叙也。誦其詩，讀其書，以求諸其爲人，其在此矣。蓋先生之言曰：嘗卧病莆陽，與釋老子之徒接，以爲其言是矣。反而觀乎吾書，而後有以知吾道之大體用之。今書卓然高風遠識，何可及也。若而爲書，自堯舜禹湯文

武周公孔子顏曾思子，論其所行之道，序其所傳之宗，蓋其用力積久而真知深造以爲言者也。至於其所自得而指示學者，歷論中學之所以蔽人心之所以晦吾道之所以不明者，俾知其蒙之所在而發之，以求夫不遠之復，而曰不遠復者，入德之門也。嗟夫！此顏子之學也。先生以顏子之學爲學，而告諸學者，亦以顏子之學爲學焉。今之學者，欲求先生之學，不以顏子之學爲學，豈先生之所以望於學者乎？蓋嘗竊彷彿其志氣神明之萬一矣。大才足以用世而斂退無悶，登山臨水，與其師友講明授受，不厭不倦，而至於嗒然忘言，遂以終日精明高簡，孰得而窺之？若夫終身之慕，不忘於體魄之藏俯仰之安，不昧於死生之際，就其所存以極其所至，吾黨小子，其何足以言之乎？嗟夫！聖賢千載不傳之緒，中興於濂洛而世變隨之，胡氏之所得在於籍溪，楊氏之所傳至於

延平文公皆受而傳焉原其爲學之端實先生爲之根柢不
然弱冠之門人字而祝之即期以顏曾之事豈無見而然哉
而後知文公之於父師其報均罔極矣諸君子之遺跡皆在
此鄉也會其通以成其業可不推原於此堂也乎李公端字
彥方世保定儒家歷御史史館領臺成均以至正固有守左
君當海寇犯漳約束保障郡縣賴之幹公字克莊西夏舊族
通經制行泊如諸生繇禁廷遷御史六命皆耳目之寄於
尊師崇道之誼尤篤前郡守暗都刺治郡十年至今人思之
監郡馬合謨郡守麻合馬皆以善治聞倅劉伯顏文雅通敏
幕府諸耆陸文英羅慶協心以贊之故斯役也無間言而有
成功可以至於久遠矣督學上若前鄉貢進士錄事判官也先
建安書院山長申魯誠是年十有一月十日前奎章閣侍
書學士翰林侍講學士通奉大夫知制誥同脩國史

虞集記

考亭書院重建文公祠堂記

國家提封之廣前代所無而自京師通都大府至於海表
窮鄉下邑莫不建學立師授聖賢之書以教乎其人羣經四
書之說自朱子折衷論定學者傳之我國家尊信其學而
講誦授受必以是爲則而天下之學皆朱子之書之所行
教之所行也教之所行道之所行也今郡縣學官之外用前
代四書院之制別立書院以居學者因朱子而作者最多建
寧一郡書院凡七皆朱子之游自或因其師友門人而立者
也考亭書院在建陽城西五里其始末有熊彖之記陳義紀
事甚大而備然而賦入不充於虞稍而繕完不能無疏也至
正元年辛巳通守劉侯伯顏至郡且二年矣文雅樂善以學
校之事爲己任知無不爲文公之五世孫所以考亭之事告

通守曰是吾職也乃輟他學之美積得中統鈔千五百緡以
屬諸縣典史陳德敬共其事與山長朱汝燾直學張隆祖會
邑人士而告以侯意咸曰此吾黨小子願執事焉第侯公府
爲之完爾翁然趨勸而共作新之加葺更造悉視其所宜而
不敢過自堂祖基亦既合矣而新作文公祠堂先成斫以部
使者太守之命來求屏山書院記遂并求考亭之書焉蓋聞
諸斫曰今考亭書院昔朱子之舊宅也其先吏部葺齋之言
曰考亭溪山清邃可以卜居朱子不忘先君之言蓋至於晚
歲而後能築室以成其志而終身焉於是百五十餘年矣意
其精神魂魄之往來猶鑿鑿於茲者乎子孫後進來學於斯
者誦詩讀書求其志氣神明之所在嘉說之薦執事有恪高
堂虛室若有聞乎其音聲瞻前忽後若有見乎其儀刑思其
居處思其嗜好思其言語雨露之沾濡焘膏之升降觀感而

化之首莫斯之爲近也况夫鄉之遺老宿師微言緒論家傳
人道耳熱心存者從容誨言以相勉勗則有進有得而不自
知其然者將亦在於斯矣昔者郡魯之風所以見聞於天下
後世則亦密邇聖賢之居云爾吾何幸於考亭見之至正元
年歲辛巳十有一月前至章閣侍 書學士翰林侍講學士
通奉大夫知 制誥同脩 國史雍虞集記

澧州路慈利州重建二百里朝記

國家之制自國都至於郡邑無有遠邇守令有司之所在皆
得建廟通祀三皇而醫者王之蓋爲生民立命之至意也若
稽在昔

世祖皇帝丕承大統神武不殺奄有萬邦天下旣寧兵偃弗
用禮樂刑政治具畢舉以言其事謂曲辰黍爲衣食之本始置
勸農之使而親勸之厥有成績而守令得兼其事而摠以大

農學校教化之原也庠序之教孝弟之義聖賢之畫脩已治
人之道大小相承皆命官以掌之於是山川之靈聖神明之祠
凡可以衛吾民之生者莫不秩祀其於民也愛之深而慮之
遠思之至而保之固其復有遺策哉獨念夫血氣動乎形骸
之內寒暑感乎時序之異不能無傷疹者焉則致意於醫者
之學又慮夫師匠不立古學既絕遐陬遠邑混於一方一曲
相傳之私而不足以通其極也推而上之原其所自出必至
于三聖人然後止是此三聖人之所以惠利生人者不必以
醫之一伎而求夫爲醫之道不上達於三聖人則不足以盡
其神聖之能事噫制作之盛蓋如此而不察者徒以文具應
故事豈足以知聖明之微意乎慈利州達魯花赤故丞相阿
里海牙之孫丞相親事
世祖皇帝承命南征以不殺爲務克成大勳襄漢湖海以來

盡乎南服被其澤既久是以監郡之治慈利獨有以知

國朝愛民之實是以於其州之二皇廟獨能深致其力焉廟

成求予記其歲月其廟有殿有廡有門亦有學像設位序皆

如京師之制而氣象宏偉他郡所莫及也噫州之人士有

正有蘭從長史而有薦於斯也其亦思夫去朝廷之遠而

治化之極不異於中州謹身於父母之所全生順時於天地

之所享壽修地利以給公上循禮義以樂昇平長吏奉宣德

意吾民熙熙然罔上之恩德不異於伏羲神農黃帝之盛

豈不盛哉是役也前安定軍民府判官田榮孫實任之其費

中統鈔五萬餘緡榮孫世有武功而好文喜教子本吾蜀人

去官而隱居于此州之仙人溪者故併及之

撫州路樂安縣新建二皇廟記

二皇廟者祠伏羲神農黃帝之神自國都至于郡縣皆立

諸醫者之學我 國家之制也元統癸酉之冬前淮十變理
溥化來爲撫州樂安縣達魯花赤下車謁廟於委巷歎其圯
陋弗虔爲政期月簡易明恕之效民安而信之遂以無事乃
度縣治之所當爲者次第爲之民聽從無留難下地擇材庀
工以改作斯廟其一也既告成進其人而告之曰古者飲則
祭先酒飯則祭先食示民不敢忘其初開物成務以興民用
者有祭道焉專宮爲廟象人而事之則自後世矣然而有其
舉之而莫之能廢也上古聖神繼天立極斯民生生之道萬
古賴焉祀典之重禮亦宜之而不特專爲醫者之宗夫求盡
民之生養而思拯其害足者莫要於醫也醫之爲學推所自
起舍此將安所宗哉昔人謂吾邑之地去官府遠無以撫鎮
吾民也置縣于茲餘二百年而衣被我 國家之仁澤亦六
十有餘年矣 天子之命吏代至以時輔吾民生者無間也

今吾之來獲承事於治教休明之日年穀無其蠶害上無徵
調之急外無枹鼓之警苟有少厲於民者上請更之必不見
違庶乎與吾民之少休息也斯廟之作豈特爲觀美而要譽
乎豈將使吾民諂事以干福禱罪如他淫祠之爲乎蓋以廣
我 國家推本聖神之道以道吾民之生養而已吾民俗剛
而好義其君子強於敏學於觀感爲易焉吾何言哉雖然朝
因於醫請以醫喻爲吾民者奉其父母所生之身而敬保焉
務本而力作安分而定志則得其常矣察夫四時寒暑之變
五行爭異之沴而謹避之又察夫嗜欲之陷溺忿恨之觸興
矜勝之煩耗機筭之幽刻毋使有以害乎其中也殘闕屢弱
蠱亂腊毒搏噬蠱螫毋使有以嬰乎其外也脩叙倫理受業
服事以老子長孫於 聖世而無窮焉區區之志也既而具
以來告請文記之以刻諸石以示來者其廟之殿崇二十有

一尺深廣皆一十有四尺殿門之崇十有七尺庶之崇亦如之都宮有垣有門其成則仍改至元元年乙亥之冬也

崇仁縣重建醫學二皇廟記

傳曰天地之大德曰生蓋言乎天地之心生物而已矣篤生聖神代天工以前民用開物成務世以益備因其人倫之常而教之懼其不率也則有刑威之設焉因其生聚而為之井里保息又懼其無以待凌暴也則為之城郭甲兵焉為之宮室以蔽其風雨為之衣裳以宜其煖寒為之食飲以時其飢渴猶懼夫六氣之沴害於外七情之感傷於內或不得以全其生也是以有醫藥砭熇之事焉凡所以因其事而制其變思盡其道以遂其生物之心而已矣自是有其德而有其位者莫不述焉我

世祖皇帝混一字內兼取古今之制百度修明以天地之德

為德以聖神之能為能凡所以為民物慮者周且悉矣若夫所謂醫學二皇廟者蓋其一焉天下既以治安遐邇一家仁德所被兵息刑措而萬國生聚之衆其瘵痼疾痛不得不以為憂是以郡縣無間內外皆設廟學置師弟子真而教以其藝使推本其先聖先師而祀之作伏羲神農黃帝之像南面參坐而以昔者神明之醫與凡為其學而著名者以次列坐配享從祀略如近代儒學之制常以歲春秋季月之吉守令具牲禮行事著為令受民社之寄者罔敢不恭然而在官者或不足以盡知

國朝聖祖之深意狃於故常而忽其事者蓋有之矣非知治體者孰能職思其憂乎初崇仁縣始以制書創醫學大德八年得舊社壇之地於邑南東門之內計地之直邑之醫士醵金上送官府更置醫學以祀以教因陋就簡二十有餘年

于茲仍改至元之二年歲在丙子承務郎達魯花赤阿里仁甫始至而謁祠焉顧瞻而歎曰百里之邑

天子置命吏托以民社而祖宗累世嘉惠民物之心無以顯揚而宣布之微遠小臣不敢不盡其心也既上事縣政以次脩舉風節廉厲未數月而民信服事或倉卒至皆從容處之旁邑方騷然圖圉而事已告集均平有度民不加病方伯郡守部使者察其能而嘉與之乃得以其優假以行其長民之事出俸金以作新斯廟焉縣令永簿尉僚吏克相成之無間言於是邑士嘗為掌醫之官者與夫習醫以為業佳藥以為生與凡有力而好施者謹趨而輻輳不待驅率各効其功經始於是年之三月為廟間基之崇若干尺深若干尺廣若干尺屋之高若干尺凡楹神門兩廊稱之其都宮有墻前有門朝之後有講堂醫之師弟子講學在焉邑之長邑有

祀事則齋焉其像設尊者像之其次者繪之凡屋之柱門戶燔神之室若座有丹牘梁楹而彩飾闡楹以石唐皇以粦祀享食飲各有器以明年丁丑之歲九月告成而行其時事焉邑之吏民以予嘗待罪國史老而歸寓於斯也請執簡而書之集乃為之言曰所謂天地生物之心即人心而可見矣今吾長民者有以知乎天地之為德聖神之為能我聖祖之為制你思有以遂其心焉凡為吾人者何可不盡其心以求生生之理乎蓋嘗聞之善養生者莫若理義脩其孝弟使無逆理敗常之萌脩其忠信使無險薄放肆之發則善良相薰和氣洋溢安分受職幼幼老老雖有燥濕燠寒之變情欲事物之感其所傷亦微矣是以上古之世無奇衰之疾不待鑽灼其肌膚苦毒其腸胃而泰然委順登上壽而不衰此二皇之所以為盛也若夫人欲勝而天理滅良心喪而百

體隨之內邪外害萬竅並入雖和緩並生於十室其若之何哉此又吾賢公長之意不徒在於宮室之美觀瞻之崇者集不敏安得不為吾邑之父老昆弟子孫言之哉

袁州路分宜縣新建三皇廟記

國家置太常禮儀院以奉天地祖宗之祭外則山川鬼神之祀典咸秩焉其長貳參佐十數人通領之典故議論屬諸博士而郊社宗廟執禮治樂器服幣各有攸司而審時日庀物數治文書以達上下中外分隸職事者則存乎府史矣是故千羽舞蹈之容律呂如終之奏玉帛品物之節醪醴牲殺之儀滯豆鼎俎之宜弁旌進退之宜且鬼神享格之義凡從事於斯者莫不通習而具知焉故其出為外有司以其見聞施諸行事則有非他官所能及者若分宜縣令周君益臣自戶部史擢為太常掾者數年歲滿宰晉寧之安邑又宰袁之分宜

所以能惓惓不忘於三皇之廟祀也郡縣之祀境內山川鬼神之在祀典者有 詔令則脩祀焉有故則禱焉其定制通祀惟社稷與天子我 國朝始建三皇之廟以祀伏羲神農黃帝自國都至於郡縣通祀為三矣祭於春秋之季月有司守令行事醫諸主執禮致拜告享倣於儒學而器服牲幣亦視以為法我

聖朝之制也昔者分宜始奉令立三皇廟因縣簿之舊廳以為廟在縣治之左今令居之右歲久屋壞遷神於門既弗妥又寓神於他神之廢祠朔望謁拜與歲時祭祀大不恭肅守官於此者視為故常漫不加省周令以嘗從事於太常也獨知懼焉而邑無他賦可以庀役而心無一息之安也為政年餘歲豐民安粗有餘力乃徹故祠而新之度故祠之基東西得一十六丈自通街達於市深十有一丈作闢天之殿以奉

二聖人刻貞木以象之。容服之飾如京廟所定。殿有開天之門。外有櫺星之門。殿前有二獻官之次。門左爲惠民藥局。右則守廟者廡焉。而都宮環雘於外。門矣。作於仍。改至元之五年三月。告成於八月六日。嗟夫。爲國之以禮者。尚矣。習於其文者。尚能有所感發如此。况乎深知其本而得其意者乎。噫。聖人之爲斯民慮者。周矣。賢人之爲義。其一焉。人之生也。有形體血氣之養。七情傷乎內。六氣診乎外。與夫變異傷殘之。不虞隨而揀之者。其職也。是以我國家重之。若夫推本於二皇者。蓋欲斯民涵泳於至和之中。休休焉。以安雍雍焉。以居。以樂於無爲。而求於天年也。而至於不識不知。順帝之則。豈非聖祖神宗設廟祀之初意乎。長民之君子。尚因是而思焉。至元五年歲己卯九月。具官虞某記。

吉安路三皇廟田記

今天下自國都至於郡縣。得通祀者。惟社稷之神與學之先聖先師。而醫學有伏羲神農黃帝之祠。居其一焉。郡縣儒學有田以供祭祀之牲幣。祭盛器血。與師弟子之飲食。或因前代之舊。或取閑田給之。雖多寡不齊。而食與祭可不盡取。諸有司矣。醫者之學。國朝之制。始遍天下。其初廟祭祀。教養率依倣儒學。然而歲以春秋之季。脩祀事。有司取具而已。或至醜諸醫者。而師弟子之廬。稍無所從出。夫國家制爲通祀。有司之重事也。伏羲神農黃帝。所謂上古開天立極。其神嘗自尊矣。醫者掌民之疾病。察四時六氣之診。五藏九竅之變。養之以食飲氣味之宜。攻之以砭焮膏液之毒。其係於生死甚大。而其術亦精微矣。顧無以資其爲學之具。差其全否。之食是故。良有司。稟然懼無以稱。

聖朝之意而爲醫官而知所重輕者恒懼不能稱其職焉吉
安之爲郡土厚而物殷論人材文物之盛則必稱焉然而醫
之爲學猶未大有所興發者則時力有所未至耳乃改至元
之二年其守張侯浩介其郡人醫愈郎遼陽行省醫學提舉
謝紹孫以其修理醫學之事來告而請書之云其郡始建醫
學在城南去廬陵縣獄爲近延祐七年郡治中乃兒赤率廬
陵縣丞馮克敏遷廟學於廬陵縣舊治於是新學之成十六
七年矣張侯之來有民鄧明遠請以其所得賞田之半歸諸
醫學以備用狀上侯與司官議許之乃命吉水州達魯花赤
佛留與其學教授鄧思泰經田定其頃畝之畔計歲租之入
得米一百五十石有奇而耕者姓名府乃爲之文書而授諸
醫學師泰乃白諸府以所收大脩三皇殿與門廡及其講堂
作齋舍及其庖自是祭祀有備師徒有居食矣今郡縣有司

道園學古錄卷之二十一

歸田集卷十一

雍虞集伯生

記

飛龍亭記

昔者

文宗皇帝之在潛邸東南海岳湖江之上車轍馬足有所至焉則守吏民庶欣感榮幸隨而表之以識其愛慕之意既登大寶自天光日華之所被及山川草木與有榮耀則必有所述以示乎天下後世若集慶路大元興永壽宮之飛龍亭其一也亭成久矣而宮之住持道士一勅賜虛白先生臣陳寶琳始錄其事即臨川山中臣集記之亭本治亭宮本玄妙觀集慶本建康路皆

文宗皇帝所賜名也方在全陵時行邸去治亭為近上

時遊焉一日傳命且至寶琳出宮門迎候逾時從官已奉御供具及門則知上已至治亭久矣引鍾山之形勝俯城郭之佳麗顧瞻徘徊悠然有化育之治焉從臣以寶琳見上笑曰道人何避客之久也寶琳頓首俯伏請罪上曰山徑幽雅取便而至宜爾之不知題治亭者虞集今何在也皆對曰今在翰林充學士命王僧家奴摸而觀之因藏諸篋問寶琳何以字玉林也則對曰道士燒金石爲丹永抽鼎中狀如瓊林玉樹故取以爲名上曰當雪時吾登此亭目力所及樹木皆玉也豈不易知乎更謂之雪林後臨御別書雪林字賜近臣趙伯寧而寶琳仍字玉林矣謂寶琳曰吾出游數勞人不如山行之便可作柴門嚴扃以待余之往來自是數至寶琳野人見上之樂而忘其微賤或持酒引裾留上上欣然爲之亦不責也天曆己巳寶琳與其宮之住持

趙嗣祺朝京師始置先生號以賜金陵道士之嘗得見者嗣祺曰虛一先生寶琳曰虛白先生得之者纔止二人耳蓋異其數也時賜新宮名而治亭名飛龍矣明年之二月二十五日臣集侍立

奎章上頤謂曰汝猶憶治亭乎亭傍松當加長茂臣集對曰集到治亭時未種松也上曰朕遊治亭見卿書以爲繫千載之思實慨朕懷因命臣集書宮亭新名以賜而寶琳持歸賜南御史臺錢若干新其宮所謂治亭者既名飛龍加飾楹楹置御榻其中重覆而謹視之別作亭其下仍曰治亭以當鍾山之秀名之曰鍾英宮成行臺御史大夫中丞以下及郡縣守吏咸集于此以後

天子之賜矣嗟夫亭成至于今十有一年而文宗皇帝之棄臣民將八年矣微臣辱在草野未先朝露詎

能為寶琳執筆以述 恩光之萬一哉於惟 今天子仁孝
純至勛華相承堯牆之見無有遺思

文宗皇帝神靈在天陟降上帝雖曰不可度思而日月所照
霜露所墜頌懷下土於萬斯年臣民之瞻仰焉有窮已乎臣
敢不述事亭石以昭示來者仍改至元之五年歲在己卯十
有一月日南至臣虞集謹記

權茶運司記

昔在

世祖皇帝既一江南至元十二年江州之人即獻茶利明年
收其征入中統鈔千餘錠自是天下又安

列聖相繼德澤涵煦民無重擾生息日繁食用滋廣茗飲之
利衣被遠邇至于今六十年而課賦之增乃至二十八萬其
設官則十七年始立江西等處權茶都轉運使司二十五年

去權茶字兼領宣課二十八年復權茶各官所統出茶之地
則江西湖廣河南江浙四行省之所部而其治在江州分布
提舉官其遠者分司以蒞之臨按之司有助無撓郡縣奉行
信約唯謹其委任可謂專且重矣天曆 詔書首運司而以
其事分屬列郡歲侵民困採造懋遷觀望疑沮徵斂失節公
私交病守令不勝其責具言復立運司為便 朝廷遣使周
詢不遺山谷數月復命以為宜從所言元統二年復設運司
於江州總治之規率如故事而用人益慎重矣於是以脫脫
木而與薛公某為之使萬嘉納為同知魏君某為之副某人
為判官其幕府則經歷某知事某照磨某也或以風憲清強
之舊或輟朝省侍從之貴或以操守之素或以材智之優是
以皆能清心而省事奉法而循理不亟不徐有嚴有恕府史
僚屬各知雅餒外絕苛橫之使庭無誣訐之訟期年之間利

入時足民度之家至於官府頰首供億心絕他慮若不知有
重立大府者然治政之美卓冠往時而公署以幣弗治出令
受事弗稱宗顯文書貨幣蓋藏疏闊乃請于朝而更作焉
命未下自使以次出俸金爲之以是年某月經始廳事府庫
具會秦公某自中書出守郡多所勸相而賜幣凡二千緡又
至得以增置吏舍門垣以其月某日告成別賜鈔五萬緡使
貸收子錢以具公膳朝廷所以示廉靖勤敏之報也乃爲
書幣命其史謝秀寔至臨川山中屬予記之噫集向在國
史執筆書事故其職也今老病才退恐不堪事史曰秀實之
來吾使命之曰吾於公有同朝之好必不我靳也然則其何
敢辭乃具記歲月行事如上而爲之言曰夫有土有民出財
用以供公上故其分也而東南民力竭矣今法制之講已詳
盡而無失賦入之數已成定而無餘若數君子之安行無事
者使視夫措則而有所警發云

江西湖東道肅政廉訪司經歷司題名記

蓋嘗觀於前代傳記自朝廷中外大小百司度府有博雅君

子從事其間則必因其官署所在制其職分之所當爲以相

勉勗書其歲月建置之繇紀前後之居其官者次第書其名

字凡有善政可以爲法又被顯用使人有感動其不然者亦

有所儆戒焉于此可以觀政跡表人物于治道有所系此廳

壁之所以有題名記也矧乎風紀之司國是由定咨諏周悉

以達民隱職任之專威惠立足以及人他官莫並乃設幕府

司其喉衿執其轄轄文書之詳委出納之緩急精審以贊畫

如期而集所以保息吾民以厚國家生才之根本豈不深遠

矣乎彼以聚斂培克爲能者作威煽毒黷貨殖私上爲國

家斂怨蓄逮其身而不悔亦獨何心也哉敢重言之以告來

者使視夫措則而有所警發云

蓋嘗觀於前代傳記自朝廷中外大小百司度府有博雅君

子從事其間則必因其官署所在制其職分之所當爲以相

勉勗書其歲月建置之繇紀前後之居其官者次第書其名

字凡有善政可以爲法又被顯用使人有感動其不然者亦

有所儆戒焉于此可以觀政跡表人物于治道有所系此廳

壁之所以有題名記也矧乎風紀之司國是由定咨諏周悉

以達民隱職任之專威惠立足以及人他官莫並乃設幕府

司其喉衿執其轄轄文書之詳委出納之緩急精審以贊畫

如期而集所以保息吾民以厚國家生才之根本豈不深遠

矣乎彼以聚斂培克爲能者作威煽毒黷貨殖私上爲國

家斂怨蓄逮其身而不悔亦獨何心也哉敢重言之以告來

者使視夫措則而有所警發云

諾從容平易使無過不及之失則又司臬之要焉是以朝廷之命是官必極一時之選使之省治文書參酌議論持平上下之間實在於斯其務豈不重乎江右在乎荆揚之交湖江之表控接閩廣嶺嶠界焉風氣內寬而外固民物繁阜郡縣羅絡文法出入實有勞于聰明視他道爲重矣而經歷司之設自置司至於今五十餘年名士相望乃至於今日豈無意於廳壁之題哉夙夜在公豈有不遑暇及者今經歷某郡王頤字 知事某郡楊杰字 照磨某郡左仲良字 皆以清明敏達之資忠厚沈潛之懿敷歷臺省並著推舉同寅協恭盡瘁王事以奉崇臺之信任以承憲長之肅清激揚無私懲勸有道環視數千里之間官吏莫敢不率其職細民無有不得其所晏然鎮靜

聖明在上無外顧之慮豈非得人之效哉乃以暇日樹石斤

事不鄙衰朽以嘗執筆太史使書其說焉自王君以前掌故者可推而錄之後三君而至者以次書其爵里名氏歲月以垂示無窮焉他日三君子者政成歸報 天子進用之或以國事往來行履之舊而亦有所觀覽亦古人之意也歟仍

改至元之四年歲紀戊寅三月吉日具官虞某記

撫州路總管府推官廳壁題名記

江右諸郡惟臨川獄訟號爲清簡非直其俗之美然也蓋亦係諸其人焉昔夫子之言曰無情者不得盡其辭大畏民志聖人之道大矣何敢幾及然其言則爲政者之所當從事也夫有生之民其情不大相遠也明政刑者必有忠厚惻怛之意始終不貳至誠所孚無有間雜則足以感化其心而爭鬪之念不作矣其次則明燭情僞不苛不察欺罔無所容隱微無所匿使僥倖奸黠無所遁情則亦莫予侮者矣其或柔不

足以立已剛不足以制欲荒忽而昧於事幾惟怯而奪於形勢則雖太古淳朴之民氣血所感利害所關安得不爲之動至於變詐相尋於無窮乎此所以係乎人也至於官卑而不獲乎上方弱而見計於下是則有天理存焉是在乎誠意慎行之積姑當自定耳予之歸老而僑於黃洲之曲郡推官于君公諱字夢臣揚君景行字賢可歲以祁寒盛暑行縣稍間必造予之廬焉于君夢臣世稱長者安靜而涵容治郡者每尚威權爲操縱而君以仁厚佐長吏郡人有佛子之目焉賢可國家第一科進士周知民事而不憚煩嘗宰郡之宜黃最強暴鋤姦黠抑兼并以佑善良民至今稱之及來茲佐郡人已素字之激厲之節雖不得盡行其志而匆匆堯道路亦知其直道而行矣今李君德芳字予雖未之識然蕭規曹隨同寅共事不間於吏民之言豈非郡府之良而市井田野之

幸乎至正元年閏五月公詔以書告曰予治文書聽兩詞之署庫且壓去年與景行圖新之不以煩民也而吏舍司獄之廳亦偻度地廳事之東以作高亭焉環以卉木之實醇應之暇則小憩焉擇於郡史得某人董其役功未訖而賢可代代之者李君德芳既相與共成此亭而相謀曰國家置郡以來將七十年矣居是官者無慮數十人而姓名爵里未上去而代遷歲月無攷豈無行事之善及人之美而人無復能道之亦可惜哉欲龕石於壁詢諸故府求其可知者錄之不可知者闕之繼自今以往官於此者得題名焉求一言以叙其意噫不亦善夫善居官者無所苟而已矣苟也者因循展轉姑度歲月而不事事之謂也苟之心生則亦無所不至矣一二君子不惟竭力於其身又欲上推前官之所不及爲而有待於後人可紀而爲是也豈非君子之用心乎千里之內民

事之利害久而忘之則懲勸之意衰而興除之政闕使其人
建立於一時者猶不忘於他日則斯記有所繫矣得失之辨
人心之公有不可泯者亦於此乎見之故為之書以為廳壁
記至正改元辛巳歲閏五月日具官虞其記

龍興路重建滕王閣記

國朝分建行中書省其鎮乎江西者即龍興而治焉郡城之
上有曰滕王閣者俯臨章江面直西山之勝自唐永徽至元
和十五年百七十餘年之間其重脩而可知者昌黎韓文公
記之後五百四十九年當我朝之至元二十有一年省臣以
茲郡貢賦之出隸屬東朝乃得請 隆福皇太后賜錢而
脩之記其事者柳城姚文公也又四十年
今天子即位改元元統其明年甲戌江南行臺御史大夫塔
失帖木兒時以丞相來鎮茲省嘗登斯閣而問焉追惟

裕皇 先后之遺德期有以廣

聖上之孝心平章馬合睦贊之曰重熙累洽之餘民力亦既
紓息各蹟弗治將無以致執事之恪恭也集眾思於僚佐請
于

朝而作新之既而丞相移鎮江浙丞轄以次或陞或遷平章
寔克始終其事焉厥既落成省府使人適臨川之野而命集
記之集曰噫昔韓文公之記是閣也猶以名列三王之次為
幸今韓姚兩文公之 文章然相望於千載之上而辱俾集
繼之能無弗稱之懼乎且一閣之遺見崇於今昔者如此彼
滕王何其幸歟將命者曰吾相君之屬筆於子也其咨度於
上下也審矣且予嘗從事於 國史今老而寓諸其境於言
事為宜宜勿辭也乃為稽諸郡檮以是年十二月丙子授工
庀役越明年乙亥仍改元至元之歲其五月之言柱立梁舉

又明年丙子七月竣事閣之崇爲尺四十有四深如崇之度
而廣倍之材石堅緻位置周密聲宇虛敞丹刻華麗有加於
昔焉會其費爲中統鈔十六萬五千餘緡因前至元故事給
自內帑用之有制民不知勞赫然足以成文藩之盛觀焉烏
乎洪惟

聖天子躬脩孝理化成於天下登庸宅揆之臣承之以慶賞
刑威之制風紀之司振肅中外自方伯連率至于郡縣奉行
教令罔敢踰越其規模宏遠漸被所及無有不至者矣頌茲
江湖嶺嶠之交至于海島邈在南服勢若遼遠然而涵煦之
久保障之固生齒數千萬日滋以庶無外事以奪農時舟車
畢通無所底滯倪然咸知畏法而安分以服力于公上況乎
禮義文物尚有可觀於其間者乎于斯時也來蒞是藩者及
歲時之閑暇而與往來之公卿大夫觀風之使四方之賓客

若屬吏之來受事者相與登臨覽觀於斯閣優游雍容以歌
頌

國家之盛而發揮其尊
主庇民之心不亦偉乎

襄陽路南平樓記

昔我 國家之經營四方也嘗以重兵戍襄樊臨制東南既
而圍襄六年而克之遂以取宋南簿嶺海莫不率服區宇既
定徹兵以息民其留鎮襄陽者兩萬戶之兵也於是其帥揚
侯珪以至元 年即故山南東道節度之牙門作新樓於

其上戎幕治焉姚文公名之曰南平而爲之記落成之日作
楚人之歌以相之至于今六十有餘年矣其爲樓也屹然中
郡而高起風雨旋薄歲久不支今萬戶明威將軍完者禿懷
遠大將軍揚克忠武畧將軍也先帖木兒葺而新之則仍改

至元之六年庚辰之歲也既成以書抵江南求予記之嗚呼
襄在荆豫之交水陸之會自古形勝之國也

世祖皇帝神武制勝之迹在焉非文公之雄文震蕩悲歌慷慨殆不足以當其山川而集何足以言之哉今夫襄之爲城
頌頌千里北出方城渡沔水達乎周鄭晉衛之郊東出乎臯
傍徨乎陳蔡齊宋之野大車之彭彭駟馬之洋洋攘攘紛紛
爲利祿而往來者塵相及而袂相接則昔者戈甲之所趨芻
餉之所輸也湯湯江漢之流在縷添革未麻菽麥衣被乎東
南湖海之間者則又皆昔日竭其民賦疲於奔命以自救之
徒也原田每每十千其耦林樾邑屋參伍鱗次比隣婚姻飽
食以嬉燕息而歌者則皆前日深池高墉晝戰夕備不能一
朝居之地也嗟夫天下之治平久矣海內一家偏方下國恃
險阻以自固者悉已剗削消磨而無復遺跡况夫襄之爲郡

蔚爲內地涵煦聖化休養生息之深厚者哉士大夫鞅掌王
事之餘馳驅之暇樂其風俗之淳美士力之完復於是
有逸屠安食之思而四方游士賓客以相後先他郡蓋莫之及也
而爲之民者幼者壯壯者老者日以盡矣徒知其長子老
孫養生送死之樂豈復有知祖宗經理艱難之初師武臣力
之故哉想夫元戎當歲時之豐樂軍士之休寧與其守臣賓
注吏士飲酒作樂於斯樓也憑高望遠徘徊四顧觀夫人民
城郭山川草木於煙雲晦靄之間道先世之功烈以詔其子
孫使毋忘警戒於無虞而世世保茲樂土以奉
國家盛德於無窮則自二將軍始也峴首之崇擅溪之深視
彼異代之士慨盡瘁於一時使遺名於後世而自託於茲者
則可以一慨也夫

中順大夫撫州路達魯花赤雲中塔不台侯以其郡治譙樓成屬予作文以爲記集昔者以文學爲職業既老而歸僑乎君侯之野將命者郡庾吏宣予從子也寔來其敢辭乎稽諸郡志自刺史危全諷建府治於此至于今四百餘年凡守居有興作碑志略可攷而譙樓之歲月無述焉蓋亦已久矣至順三年四月大風樓壞明年十月總管東平劉繼祖與今侯相繼至郡謀更作之以是年十二月經始又明年劉守致事去無代者侯以爲已任其相之者治中阿普海牙推官蔡喬黃明經歷牛某知事康某照磨王某也元統三年與侯樂斯樓之成者同知府事木八刺治中和尚判官王某推官李輔崔中經歷蔡郁知事蕭從龍照磨蔡某而始終主書計者萬實也而斯樓也據地高勝屹然有臨其下則囂塵旁崇廣道中關郡長吏帥其僚佐奉

詔令出教條入而聽政出而退食萬事民庶之受事使命賓客之送迎小大莫不由之其上則晝謹時刻夜嚴鼓角所以警動其民之觀聽而時其作息之節所係之重蓋如此非直爲觀美以資游覽者也其爲役也時其閒暇而不厭於緩相其時宜而不苟於就是以賦民度材築構望飾越三年而後成焉於惟

今天子仁聖垂拱無爲朝廷大臣百執事各率其職刑威慶賞赫然脩舉海內驚伏莫不寧謐吾州地方千里介然江湖之表涵煦德澤悠久深長郡長吏與其僚佐畏法而愛民以謙遜宣第相尚水旱之禱天格地應原穰墳衍之藝無有偏害而樓之成亦其時哉蓋嘗聞之人之常情苟免於飢渴則侈心生焉不忍於忿激則爭心熾焉徃侈而好爭則上下等威之分而輕用其父母妻子仰望之身極其私智功力之

所能而無所不至於是不能以有其休養生息君子蓋深憂之是故善爲治者必平心而正已正已則無私平心則無忤無私無忤而人信之明政刑以定民之心志崇禮義以興民之廉恥申孝悌之教博忠厚之風使吾文物之邦欣欣然皞皞然保其生業脩其貢賦以奉公上承德化於無窮不亦盛哉敢具刻以告來者

崇仁縣重修縣治記

撫州屬縣五崇仁其一也邑之望南有華蓋之山稍西爲臨川之山一曰巴山又更名相山又折而遠去西北曰羅山皆大山也其境南當蓋巴山郡隋廢郡置崇仁縣歷唐五代至于宋末無改焉水出於諸山者其流既合縣人夾之以居治在水之北則羅山之東支也前至元十二年歲在乙亥撫州內附崇仁從之朝廷始命吏治民出貢賦兵革之餘吏全弗

葺二十六年歲己丑達魯花赤麻合謀始作之良材巨木取足於山會閣崇觀徙諸故家遺構竹木陶甃百廢並作頗號雄偉繼至代往因仍支吾荏苒歲月遂以弊壞五十年于茲矣仍改至元之元年今達魯花赤阿里仁甫是來咨其同官令丁也先作而新之民安其政勸率隨應有餘力者歡然赴功不數月集事梁棟榱桷易其朽腐陶甃土石更以完壯高而危者下之以即安卑而陋者增之以改觀丹碧輝煥黝堊明白儼然高堂寬敞夷坦內臨外仰無所壅蔽上官行縣賓至如歸凡器所需纖悉備具府吏有受事之舍版籍有度藏之室獄庾之嚴固廐溜之細微出而使民燕而逸勞亦莫不有其處周視列邑未有整暇完美若此者矣蓋茲邑之地壤土平衍無甚瘠甚沃之弊故其民安於勞而敏事水之東出者易易易涸阻爲陂塘以備旱舟載之濟往多而來寡無十

百之利大賈不至備物致用苟不苦窳故無過於侈靡之傷
焉方其盛時弦誦之聲無間於井社衣冠文學之家聯絡相
望退讓謙抑習而成風出而仕者多繇文史、國朝以經術
設科取士屢有其人况有大儒縉紳先生以古道正學作興
斯文、朝廷尚之四方從之其所溉被朔南遠邇莫之或先
是以其民知愛人而易使矣間或質之不美弗率教令至於
輕失其天常亦豈自容於羣良衆善之間哉然而數十年之
間爲吏者有不暇於爲治豈斯民之罪哉仁甫親見其先人
治郡之善歷官天台無錫而至於此故能深知民隱操守如
冰雪識事如著燭憂民事如家事待同僚如手足理煩劇如
平易丁也先以國字入官敦重老成從善樂美以成百里之
功而丞張榮前簿尹昌今簿舒文琰前尉胡誠等皆悃悞無
華相與輯睦以率其屬而佐其長數年之間有休息而無嗟

歎豈易得邪嘉穀屢熟於田靈芝挺生於郊仁甫之家插斷
竹而復生皆瑞應也若夫徭役之均干謁之絕聽訟之簡先
事之慮禦過卒之暴掠止蹠突之徵呼保良善如護生劔衛
細民如捍頭目上下信之風紀直之此皆後至者可視而規
隨者也予退自國史寓老其野故邑人請爲之書如此是年
十有二月虞集記

羊角洞天記

洞天之說蓋出於神仙家所傳記多名山異嶺愛絕人世高
明空洞故以天名之而撫州譙樓前左有一卷石長三四尺
高二尺許郡人謂之羊角洞天不見其空洞可名天者世俗
相傳有人自青城山來扣石暫開得入見洞府云所謂羊角
者蓋郡城形勢南來東行而轉乎西昂然若首有石上出進
而不遂所以有角之名乎故宋紹興中守王侯拒覆以小亭

後久之守林侯某掘地而觀之未數尺大風起穴中懼而止
景定癸亥守家侯坤翁更新其亭而爲之記後八十五年
皇元仍改至元之二年也監郡中順大夫塔不台侯謀於同
官僚佐作新亭於其上既成使來求記夫府治之所在非若
荒閑寂寞之濱而有林壑之美神明之交也自守將以下有
民社之寄貢賦之事治教之托獄訟征繇營繕力役之繁承
藩府司臬之蒞治接賓客軍旅之往來一州千里之事日不
暇給又安有仙人道士逍遙徜徉於無爲者乎侯之爲此豈
非因其超世之嘉名將以滌煩渴於休暇之餘得幽深於跬
步之近與其僚友出門而觀之行庭而撫之以自託於高明
之臨清靜之極者乎噫吾聞神仙之境雖海嶠絕域初不出
乎六合之內居其間者熙々然無外物之接無內欲之萌飲
食淡泊無血氣之集長子老孫壽年長父若是者洞天之所

以爲勝者乎今熙洽之世年屢告豐黃民相安於無事豈徒
仕於此者得以優游閑暇超然埃壘之表而吾百萬之民樂
至治而安其天年不異於無懷葛天之鄉者是即洞天而已
矣蓋不必指羊角之一石而言之也噫結繩之俗微三王之
迹熄有志於治者庶幾黃老之緒餘以息民於水火不勝幸
矣豈若方今天下沐浴 聖化若是其盛吾安得不慨然於
洞天之說乎

青雲亭記

古之大夫君子所以有登臨覽觀之樂者蓋以其升高能賦
山川能說非徒爲燕游以暇逸也昔鄭裨謀之善謀也於野
則獲於邑則否是猶有所帶焉若夫能賦能說之事近不遠
乎宣雜遠有得於虛曠發謀出慮孰有彼此之間哉臨川之
城有五峯焉山形自南而來其第一峯最高有亭曰青雲自

昔守臣與其僚佐賓客休暇之次則必游目騁懷於其上或
記或詠者多矣而辭多不傳 國朝仍改至元之二三年監郡
中順大夫塔不台侯出俸金帥僚屬與凡好事有力者更新
之以予昔嘗得一至於斯亭也故求文以爲記按郡城之中
地高而可覽觀可名者二若五峯之堂則在郡治吏舍環屬
屏樹翳塞不足以周眺望擬峴之臺可以遠眺望矣而負託
城壁出於人爲於奇勝爲未足焉隱然高據總會遠邇若挈
裘而得其領焉者莫斯亭若也吾之有人民社稷之寄者從
容治下而來至於斯也凡其目力之所及皆其心思之所至
也倬彼雲漢昭回于天北瞻 闕廷如日斯近凡所以竭力
以事其上者罔敢不盡其心焉俯而視之岡阜之起伏闕闕
之生聚林養保息寧有所未盡者乎愁歎憂苦寧有所未極
者乎出入行事寧有所未盡善者乎環而觀之各山靈阜藿
乎蒼蒼能出神明以去舊害者吾理之得其道乎流水之行
可以治溝洫而備水旱通舟楫以足貨殖田疇之廣袤阡陌
之羅絡因荒易以察其勤怠時生成以驗其豐凶者吾之賦
稅力役之征有以公其勸懲者乎見之則必有所思思之則
必有所處之道矣然則仕於斯邦而來斯亭者休休焉俯仰
無愧於吾民然後得遂一日之樂者不亦難乎安得不爲之
書以待來者

道園學古錄卷之三十八

歸田彙十二

雍虞集 伯生

記

大本堂記

宜春黃忠字子中早嘗從臨川吳公游往來者數年歸而題其讀書脩學之舍曰大本堂其後得堦公門有卒業之意而公去世已五年矣公之遺書緒言經手定者皆可考信而其門人子孫嘗所親聞者又可問而辨之以自致其學顧來求予爲之記而不知予之不足以知此也噫使及公之存因斯堂也得一言以惠幸後學豈不善哉嗟何及矣而使予執筆焉其何以言之哉昔者朱子受學於延平先生先生嘗以其從豫章得之者而語之曰但於靜中看喜怒哀樂未發時氣象爲如何竊嘗由是思之所謂未發者豈非吾不睹不聞之

時乎所謂靜者豈非戒慎恐懼之至無所倚著之時若夫氣象之說亦云危坐澄心而天理自見云耳非必有模擬想像者也其師友間大旨之言傳諸學者宜無可疑者嗟夫人之受命於天與血氣俱稟而生其爲性本靜也知識生而情欲作接於物而動者紛至疊起互爲應感反覆相因於無窮雖夢寐休佚之頃其憧憧者未嘗小止而定也是以一往而不復倒行逆施謬迷顛沛以終其身而莫知反其本原者多矣彼爲佛老亦或知此以爲憂乃爲絕物壁立以自勝或爲專壹內守以自固其堅苦百倍則有之雖或梯檠之有秋然欲其立人極以贊化育則與聖賢之學爲大不侔矣今夫天道之行也必有歛肅以啓發生之機人之爲學河可無所涵養以爲動而泛應之地乎苟自始及終無一息之靜則隱微之間動機之發亦何以察其辨而致其力况於風靡瀾倒潰冒衝突而後從而制之將何及乎吾是以深感夫延平之言而竊以爲大本之立庶由乎是而區區言語文字之求宜未有切於此者矣若夫其後朱子之門人或傳其師說以爲考諸聖賢之言進脩之實尚有可言者則在後學又有以究極之吾聞子中之居是堂也以高潔自克好靜坐故以所聞告之以爲之記

時中堂後記

皮以亨氏故南雄使君之次子今平江州判官昭德之弟也嘗築別室里第之南數十步堂成求名於故翰林學士吳公乃題其堂曰時中又爲之辭焉後數年以亨氏歿又數年堂燬而辭亦亡其子霖慨然思先人之遺意乃更下構堂仍其舊名而吳公之辭不可得矣其兄榮爲訪諸吳氏門人子弟亦未之有獲也而請予以意申之予曰時中之義大矣昔者

吳子之言必有以大啓夫學者之心而使之有用力之地矣
集何足以言之雖然祭乃予甥也試相與私講之夫君子小
人對待者出於君子則入於小人矣出於小人則入於君子
矣介然幾微之辨其當致察也嚴矣時中之中吾不敢易言
之然吾所知者君子之時中既爲中庸小人之無忌憚爲反
中庸則知無忌憚者時中之反也時中未易至也而忌憚無
忌憚吾可以用力矣忌則知所畏而不作無所忌則肆而無
所不爲矣憚者知所惡而不行無憚則妄行而無所不至矣
此君子小人之辨也昔先儒嘗以靜教人其後曰莫如持敬
敬之說要矣其後又以爲莫切於畏之一字蓋其愈思而愈
精愈近而愈切者如此且中庸之道在乎戒慎恐懼求時中
者舍此而奚適哉吾徒言其求之道如此耳使歸以語其
弟若復得吳子之言使集與聞而從事焉固所願也

思本堂記

宜春黃元瑜氏好古博雅取所藏三代秦漢以來圖書器物
居於一堂名之曰尚古故翰林學士吳公爲之記而告之曰
尚論古之人莫如易書詩春秋之爲古也元瑜之所尚孰有
加於此者乎噫公之爲元瑜言者至矣其望於元瑜之所至
者厚矣嗚呼觀其器而知其用觀其文而知其實則凡觀於
古人者皆所以成己之能也由是四方之君子深有期於元
瑜焉後二十有餘年元瑜使來告曰某以先世之餘慶出而
食士之祿歸而有家於鄉顧吾族人昆弟子孫其初本一人
之身也迺作思本之堂於居室之近聚族人之爲學者飲食
而教之又於歲時具酒饌蔬果率長幼以享乎先祖庶乎凡
吾同氣仰而望焉各思其本之同出而精神血氣之感慕高
盼矍如在於斯庶有以盡吾之誠乎哉取私田五百畝之租

入別諸之以備斯堂祭與教之用而請爲之記焉然後知元
瑜之真有志於尚古者矣吾聞古之爲道莫重於祭莫切於
教而思本之堂爲斯二者而舉予安得不爲之言乎夫古今
一道也而時王之制有所不得行往昔之事有所不得爲志
之所存有所不能自己者取其得爲者而爲之豈非善學古
者歟昔者先王之制祭禮甚重且大也黍稷牲殺器皿衣服
之等其備也求於陰陽鬼神之義甚至也諸侯有國大夫有
家則各有廟焉以妥祖宗之神靈以一子孫之心志庶之
不祭未嘗不得伸其敬於宗子之家繼稱之小宗未嘗不得
專食於子孫之享而有國有家之族人幾無不祀之鬼矣後
世貴爲公卿封不必有其地名爲世祿家不必有其田於是
廟無所於立不得以行古之祭道宜無以而厲其族人矣而
況於士庶人家乎先王之遺教盡廢倫而已矣其始教至於

德爲聖人極其至而已矣自天子諸侯之國大夫之家黨術
之間其教一而已矣士之仕不出於其國農之耕不出於其
鄉無所事乎遠外故鄉里親戚之情親友助執持之事近至
若閭巷之間其耆老日坐於里門其少壯日出而誨之以所
當爲夕入篤之以所不及則是父兄無不教其子弟者矣後
世身無以爲教教不以其道或工文藝以事進取趨游末以
縱利欲遺君後親之心舉世不怪不厭又何責於閭里之間
乎噫苟非真知古道之可尚者其孰能知致力於斯二者乎
想夫斯堂也絃歌之聲作必長有序而不紊籩豆之事陳始
終有常而無間於是歛福祿而敷施之通幽明之故合踈戚
之情勸酬頌祝宴樂醉飽行之有常久而無斁也前二百年
宗家太史公之言曰冲和在比一枝也其死爲善思本者發
乎然而祭與教之道猶有可言者吾聞元瑜子弟多好學尚

有以推明其說而品節其事以佐元瑜之成能乎

誠全堂記

前上元宰臨江黃君景雲入仕于朝秩滿暫還。有堂焉名之曰誠全。因桃源宰簡君正禮池陽教授吳君京來求予爲之記。簡君爲之言曰：朱子語錄有云：誠是天理之實然。聖人之生稟受渾然。氣質清明純粹。全是此理。學者則須是致力學問。思辨行直。是得日用本分事。無非實理。然後爲誠也。即是言而觀諸聖人。仲尼有云：惟天爲大。惟堯則之。詩云：維天之命。於穆不已。文王之德之純。仲尼曰：予欲無言。天何言哉。四時行焉。百物生焉。天何言哉。如此者。豈瞻企思慮之所可及哉。觀于聖人者。觀乎天者也。觀于天者。觀乎聖人可也。人之所以爲人。其性則仁義禮智。其倫則君臣父子夫婦兄弟朋友也。人而不達乎天。蓋盡乎斯道而已。故曰：聖人入倫之至。

也。舜之於堯。周公之於文王。皆聖人也。孟子曰：舜盡事親之道。而瞽瞍底豫。瞽瞍底豫。而天下之爲父子者。定。周公之東征也。詩人詠之曰：公孫碩膚。赤芻几几。君子以爲善形容。周公焉。蓋天理有常。而事之所遇有變。變雖萬端。而其常也不失。故於其間。可以窺見聖人之萬一乎。顏子之於仲尼。亞聖也。去聖人一間。爾顏子不幸短命。傳仲尼之道者。曾子。子思。孟子也。學者從事於三子之言。其至不至。則甚不齊。然竊觀前乎此。有踐而充之者。其惟顏子乎。仲尼曰：回也。其心三月不違仁。方其不違也。於聖人之全。鮮有以異乎。孟子曰：顏子具觚而微。周子曰：執焉復焉之謂賢。蓋謂顏子也。又曰：聖人之緼微。顏子殆不可得而見乎。是故天不可以意見測也。聖人不可以意見知也。從之末由之際。則亦可見其微矣。乎。然則亦謂稟性渾然。氣質清明純粹。其可以易言而輕以自命。

乎哉然而學者之所以爲學人之所以爲人非天非聖人則何所事乎是故不敢以易言之亦不敢不以此爲事也蓋嘗聞之周子曰誠無爲幾善惡夫誠者理之至實何所事於爲哉而幾之發則有善惡之分矣昔者夫子於乾之九二曰閑邪存其誠程子釋之曰邪既閑則誠自存非別求誠於外而存於此也而閑邪之道則在於動容貌整思慮自然生敬敬則誠存而於實理無所欠闕矣然斯言也亦在於言信行謹之後下學入門蓋未能遽及乎此也是故張子又專以禮教人蓋君臣父子夫婦兄弟朋友之間日用之際莫非其事而品節之微知有未盡者矣一豪之分不盡則有一豪之闕而不實矣然非知禮其孰能與於此哉故思全乎理之實者又當致力乎此所以人倫之至非聖人莫能當之集願學而未之能達也輒誦所聞以告二君子而記諸黃氏屋壁

君子堂記

臨川李本伯宗之大父以郡史從軍活屬縣數鄉之民既而延鄉先生孫履常甫教二子于家齋舍在蓮池上履常取周子語題之曰君子亭後其大父父既歿池上之居爲別舍伯宗不忍忘也因取以題其所居之堂曰君子堂而求予記之噫子之大父有陰德生理之息養和氣流行子之父受學於鄉先生成其篤望之意則子之誦詩讀書脩身慎行以君子自居則亦有自來矣夫人之爲人其類大槩有二曰君子曰小人其幾微之初則善惡義利之辨而已爲善爲善出于天性隨感而見涵養深者識察其端之自出知擴充之其爲君子也孰能禦之一念之發起於血氣爲惡爲利不能察諸其微而力克治之則其潰冒衝突壅底沉溺其不可禦也又有甚焉是以欲爲君子者不可不反已窮理而求其端也古

昔盛時聖賢迭作，朝廷鄉黨學校之間，外而交際內而家
庭無他教也。是以其時君子爲多焉。聖遠言湮，異端並起，易
書詩春秋禮樂之文，孔孟之說雖具在方冊，而僅存於世。其
學之者固陋則不足以自奮，昌狂則不能以自反。天資之敏
才器之高，則又不屑於此而他求焉。師匠不作，無所質信，汗
漫之求，沒身無得。此人心所以常昧於本初，而先王之澤不
被於天下。此豈小故也哉！昔者周子特起於千載之下，上接
前聖圖書之作，天實假之。而或者猶疑其說之別，出程伯子
天性之純，叔子操守之正，以張子之仁勇，猶出入於孫吳佛
老之說。然後卒能歸求而得之。此所謂振古之豪傑者哉。是
故有高明之資，不肯安於凡近，而過求之。其能自歸如張子
者，幾何人哉！延平李氏之言曰：舉世紛紛曰學仁義，陷身楊
墨，誰能知之？竊意斯言也，爲學之初，稍出於自私之意，歧路

之差，其失大遠。延平安得而不深歎之乎？雖然，此猶爲學道
者而言也。乃若淺陋之士，求欺世欺人之名，以竊自盡之利。
立志之初，已與聖賢大背而馳矣。而謂有志於君子者，而爲
之乎？予與伯宗游已數年，今歲留山居者踰月，察其不自安
於衆人之習，真欲自致於君子，靜而不滯，進而不止。有初有
終，庶幾無愧於斯堂者乎？幾微之先岐路之差，則不可以不
慎也。姑記其說，而相與切磋琢磨，以求其成焉。至元戊寅三
月朔記。

德星堂記

世說云：陳太丘詣荀朗陵使元方，將車季方持杖以從。既至
荀氏子弟咸在，侍側。于時太史奏真人東行五百里，賢人聚
世人以爲美談。厥後朱文公爲建寧，陳氏作聚星亭，畫贊好
學之士，蓋傳誦焉。大禧院判官陳君彥和家本蜀閬中，文惠

公出家後自鄭州遷汝寧居汝寧者數世矣昔爲御史時與予同朝有一日之雅茲乃千里貽書以相告曰我大父輔之甫居京師咸宜坊有堂曰德星李公受益所名蓋取諸聚星之義而松巖高公書之當是時鹿庵王公左山商公靜軒閻公揚公從周與諸名公卿朝請之暇無日不集於斯也今徙居寅賓坊東亦有堂焉仍表之曰德星亦不忘其先也請爲記之集曰彥和之無改於堂名也可謂宜矣聚星之應視其人焉何必古今之異也由今人而視古人則爲古人矣若古人之自視於當時則亦謂之今也今人之自視於今則故謂之今矣在後世而視之將不謂之古人乎是故方今之時令聞令望如珪如璋而顛顛昂昂來集於斯者又何必不如咸宜之君子乎且夫君子之交也以類相從吾嘗爲彥和執筆先世之遺德矣而彥和之美政又有不勝其書者今

敬歷愈久聲譽益高則其所與游之君子豈可知其人焉昔者文惠公與弟兄以執政奉其父秦公於家弟每有客至必擁笏垂魚以次侍立客爲之蹙躅不安而起秦公謝曰此兒子輩爾然則陳氏賓客之盛有自來矣方秦公時寔當五星聚奎之後其在朝之君子休光盛德至于今五尺童子皆知誦之吾故曰不可以古今而異觀也嗟夫予去國而適江湖之外故已遠矣仰而觀之天容日華初不違於咫尺蓋嘗披衡茅廓豐部而竊窺乎勾陳太微之間以求夫天津析木之次其景光潤色煌煌煜煜亦果有如太史之占者焉則賢人之德業衣被萬物者著矣而僕也得與草木禽魚以自樂於麗日祥雲之下則區區之至願至幸之至足者矣

謹教堂記

撫州府推前進士楊侯賢可爲其從孫壻龍煥來告曰吾太

和龍氏登者登故宋咸淳四年進士第仕至衡州推官其後
曰希白克世其家至其子良翁則爲國朝之人矣有志於
當時不及有所施而歿而孫曰煥今年二十餘而知爲學以
自立作堂於其居之左取馬文罔稱龍伯高之語以扁之曰
謹敕請得一言以進其學而成其志文罔漢室名儒智慮不
私於已然戒其子孫不嫌於辨別時人耳目之所及以致輕
薄謹敕之辨何其憂之深而言之切也馬氏之子孫在當時
者尤當受言而行之百世之下龍氏之支流餘裔觀於前言
往行有得於宗家德行之意慨然有感於中而思盡力焉可
不謂之知其要乎然文罔頌伯高之德則曰敦厚周慎口無
擇言謙約節儉廉公有威効之不至者猶爲謹敕之士以愚
觀之果能以謹敕自勵雖以之入聖賢之域可也豈止於是
十六言者而已哉謹之爲道蓋有存養之功而敕之爲言深

有戒敕之義蓋必有聞焉知其得於天者如是其大有諸已
者如是其全於是慎之於存養之初不使有一豪之偏雜戒
之於臨事之際不使有一事之差繆如是而致其謹敕之功
者爲學之要道也如大江之流而諸水皆從衆領之挈而舉
體皆順果知所以爲謹敕之道則所謂十六言者皆由義理
而出一源而無間矣而異端鄉原之流亦不得托其似是之
非以謬迷於當時也夫君子之爲學也爲敦厚而不爲刻薄
爲周慎而不爲疏鹵爲無擇言而不爲躁妄爲謙約而不爲
放肆爲節儉而不爲奢縱爲廉公有威而不爲私昵者皆必
謹敕而後能之故聖賢之學必曰由敬而入必曰戒謹恐懼
皆謹敕之事其可以爲易能乎哉嗚呼欲知謹之說乎板之
詩曰敬天之怒無敢戲豫敬天之渝無敢馳驅朱子曰言天
之聰明無所不及不可以不敬也欲知敕之道乎抑之詩曰

風興夜寐洒掃廷內脩爾車馬弓矢戎兵朱子曰細而寢興洒掃之常大而車馬戎兵之變慮無不周備無不飭也謹而至於事天之大較而至於憂淪胥之亡反而求諸爲學之道焉何患乎效伯高不得者采書以復諸賢可使記諸堂壁

柏友亭記

東南多嘉樹奇材求其挺特堅緻膚質若金石甚宜於其土恒有而不衰歷時變而不遷見用於宮室器用至美而能久未有如柏之爲貴者也今豫章之爲木能久能大而適於用郡以此而得各橘柚之貢專在南服斯二者非他方之所有莫或尚之然而數年之前驟遇夫堅冰甚雪之變摧折殆盡生息僅存柏之爲植同其風氣屹然如山岳之無所動搖則其所以受命於天托質於水土其必有獨異者乎環視境土之近耳目所及托乎神明歲年千百者往二有之穹山巨壑

之間不通人跡無所識察於當世乃至辱於樵牧厄於斧斤何可勝數今有君子手植茲木於戶庭之間子孫保守而封植之內無蚍蜉蟻子之蠹外無皮毛支末之毀垂三百年鬱然干霄本固幹碩駢峙對立凡四其朋若豫章魏亭胡氏之家者宜乎詩人君子相與詠歌之不足也胡氏之孫棟築亭其傍清江范德機氏題曰柏友而遂銘之後十餘年使其壻徐庸不遠二百里持以相視感喬木之如斯思故人之云遠因書此以遺之庸又請范君所以稱柏友之說乃書之曰君子於先世手澤之所存瞻望以思恭敬弗怠故宋進士龍溪君之手植歷四傳以至於今五世矣世代變易而物殊其故胡氏能世有其家二全其柏相與爲永久亦希有者哉然則棟也觀於斯木思其高曾祖父朝夕徘徊於其下若將見之豈直友之云乎哉雖然昔之取友者取於其鄉取於其國取

於天下取於古之人乎胡氏之家傳澤之又不失儒雅而
溫厚深固有聞於其鄉仰而思之俯而脩之必有得於斯者
庶幾相須以成之道乎謂之友可也然則友之道如何觀
其堅忍不拔而抑其浮游之氣觀其正直不阿以致其貞幹
之德觀其老成之操而勿志不行矣觀其以固之節而遠慮
不忽矣觀其立誠之操而勿志不行矣觀其以固之節而遠慮
觀其器也有適於用則必不肯暴棄而思有以濟乎當世則有
取於斯柏多矣柏也之為胡氏友又將見其子孫於方來乎
進士君之先自丹陽來徙于官溪二之委為東湖進士之子
所築西園在焉三世以園自命所謂小園二趣者皆以此也
湖之水匯彭蠡為大浸今胡氏之居枕之亭在居室之右多
古木奇卉而獨以柏名者重先世之植也夫其地之寬厚煥
濯見諸樹木人物者如此則山川之勝必有可觀者焉吾或
與野人釣叟徜徉於江湖偶一至其處尚能援筆而賦之

寫韻軒記

龍興紫極宮寫韻軒高據城表面西山之勝俯瞰長江間乎
民居官舍之中特為夔絕眺望如此者亦或有之至於秋高
氣清望見上游諸郡之山若臨江之玉筍撫之華蓋寸碧天
際森列戶牖此則他處之所莫及也西山神仙窟宅得道往
來城府致其憫世拯俗之意而游覽燕息於此蓋必有之郡
人相傳唐文衡吳綵為二仙豈其人歟世傳吳仙嘗寫韻於
此軒以之得名予昔在圖書之府及好事之家往往有其所
寫唐韻凡見三四本皆硬黃書之紙素方索界畫精整結字
適麗神氣清明豈凡俗之所可能者哉要皆人間之奇玩也
登斯軒而思其風采亦足以寄遐思也乎而出人塵俗之想
沈溺於胸中意謂高仙幽棲者不異於已而書其遇合之事
殊不經也蓋唐之才人於經藝道學有見者少徒知好為文

辭閑暇無所用心輒想像幽怪遇合才情恍惚之事作爲詩
章答問之意傳會以爲說去靈齋之次各出行卷以相娛玩非
必真有是事謂之傳奇元稹白居易猶或爲之而況他乎遂
相傳信雖爲其道者若文吳之事亦久而莫之察良可悲夫
蓋所謂仙者形質化泯神明昭融豈復有分毫世俗之念而
有可以受謫者乎昔陶隱居著真誥載李夫人少女降揚生
之事猶言玄契遇合真道不邪示有偶對之名初無弊穢之
迹從容接對禮意森嚴此一證也借曰以凡念之起見謫于
天自當恐懼脩省一息不敢緩而可以因循衽席之燕暇以
至十年之久乎誣吳君也亦已甚矣而使庸人孺子無所知
識更得以藉口吾黨之士其可吮墨弄翰揚灑而助之波乎
因書此以遺其觀之主者余君玄谷無重貽愧於茲軒之高
明云

余氏極高明樓記

華蓋之山在崇仁上游據地勢之隆厚拔起千仞上出霄漢
日星迴旋無所障礙雲雨之興漠乎在下若有人焉凌空倒
景高鄰日月而後足以對之浮游於塵壒之中沉溺於汙穢
之下生死不出於日暮起滅不踰於尋丈者烏足以觀乎此
哉其山之陽有水曰珠溪余氏之族世居之不知始於何代
而未嘗有他族間之山如城郭之環流泉中出隱伏磐石委
曲淵注始達于外而居人耕田鑿井養生讀書無所外慕以
其地僻而賦薄遠去郡縣公上之供給事而退人亦無所求
乎其間也晉陶淵明所謂桃源者依稀似之余氏之彥曰敬
以自然淳厚之姿居風俗質朴之鄉以其樂易之心保其
敦睦之族舒舒然溫溫然吾間而悅之世以爲風氣日降情
態日趨於薄而不復可返豈有是耶故翰林學士吳公之夫

人則敬之曾老姑也故公嘗至其處及敬作樓於其居以瞻
華蓋於咫尺而命敬以極高明題之也樓成而公已去世敬
不得請一辭以表之因其族父希聖求予記之予嘗聞諸上
蔡氏曰孰能脫去凡近而遊高明莫為嬰兒之態而有大人
之器莫為一身之謀而有天下之志莫為終身之計而有後
世之慮不求人知而求天知不求同俗而求同理者乎必如
是也而後可以造乎高明之域矣今夫小智自私而自以為
高曲見陋識而自以為明輕猥以相尚臆度以為知則其念
慮之所興云為之所及無非至卑至下之事擬諸高明真所
謂霄壤之間矣是故質之美者庶幾有以得之內顧於家無
甚不足之慮外視於物無甚必欲之意則其中之所存澹泊
而虛曠於入道為近矣而又有以考夫聖賢之學踐夫古人
之跡則日趨高明而推致其極者不自此乎秋高氣清予將

其心之神于山上而能求觀子之樓誦吳公之言而記
其千載之思於此也乃若中庸之書所謂極高明者吳公之
門人弟子多能記公之言敬審問之他日為敬講焉是為記

主靜齋記

監察御史前進士趙君承德宗吉題其齋曰主靜而求予發
其意焉昔周子作太極圖其說有曰聖人定之以中正仁義
自疏其下曰聖人之道仁義中正而已矣而主靜又自疏其
下曰無欲故靜周子承羣聖之絕學開示萬世之學者人之
所以學為聖人聖人所以與天為一者在斯而已矣蓋聞之
太極動而生陽靜而生陰一陰一陽互為其根以是知動靜
相因於無窮而太極未嘗不行乎其中也故人之為道一動
一靜相為体用而維天之命未嘗少有間斷也周子圖說所
以明乎易也六畫之卦分上下兩体論之二五其中也陰陽

各得其所其正也以重卦而言之三四人之位也傳曰立人之道曰仁與義是以人極立而三才之道備於我矣其中正仁義之說乎此之所謂靜者蓋言太極也萬事萬變不出乎此是之謂主學者之用功抑亦考乎定與主之說乎然而未易知也未易能也切以學者之事擬之而言焉夫無欲故靜靜之一言則因人道以觀天之道最為深著夫耳目口鼻之接飲食男女之際喜怒哀樂之發人之所不能無者也而遽曰無欲豈易言哉孟子曰養心莫善於寡欲寡之云者未能盡至於無也周子曰寡焉以至於無是知寡欲者學者求為無欲之漸也良之彖曰艮其背不獲其身行其庭不見其人釋者曰外物不接內欲不萌此求為無欲之道乎一程得周子之傳其教人直以敬之一字而使從事焉知主乎敬則可以馴致於無欲矣自學者論之主敬則即主靜之道無疑矣

橫渠張子又以禮教人動合乎禮所以踐乎敬之實也一豪之非禮則一豪之敬失矣一事之非禮則一事之敬亡矣故主靜者莫如敬敬又莫切於知禮禮者天理之節文也故切以為學者之事必知夫禮而不可易者而後能有所定此可以見聖人之道必先有所定者乎夫主靜而無欲者聖人之能事學者之極功愚何足以知之即其所聞於父師而困學不倦於萬一者如此宗吉以文學路高科以才識歷華要常人之情固足以高視一世夸耀一時矣反而求諸身心之學以極於天人之際而取周子之至言以名其齋而常自在之此其志豈可及哉不以予之老退荒陋而遠徵其說且夫世俗之為學質朴者安於固陋不事猷為為靜而浮薄者以不踐聖賢之成迹不考經傳之微言罔象高虛蓋飾疏鹵以為靜者此皆昔賢之所深愛而今日之所慨歎而莫可止者也

趙君有得於已方資進用又有以扶其正而抑其偏焉則此齋之設其功豈小淺也哉

環翠亭記

臨川城中李氏居宅之後有竹千百竿作亭其中名之曰環翠其鄉先生孫君履常氏書程伯子所賦環翠亭詩於其上使其父兄子弟覽觀而諷誦焉元統癸酉夏予謁告歸田而君還之使逋至從之入城府而病復作留居久之李氏嘗邀予至亭而不能往也後五年李氏之仲浩卿與其從子本訪予山中道斯亭之勝意欲予賦之者嗟夫古之大夫君子所謂能賦者豈必皆已作也昔人之言有慨于衷則永歌之以寄其意云爾孫君之書蓋為得之且溫柔敦厚之教孰有加於程子之言哉然程子之詩其首章曰城居不見萬山重而臨川之為郡城中多岡阜城南第一峯為獨高別支曼衍而

西出其止也為羅家之山李氏之亭在其東麓程子之所謂不見者而斯亭得之則其地似有以勝之者矣其卒章猶有暫遊遽去之歎而李氏之環翠亭乃未嘗一至焉此又何由賦之也耶雖然李氏之先有活人陰德竹之生意沛然似之李氏羣從子弟八九人皆好讀書伊吾庭戶聲若金石其秀挺玉立又庶幾似之且聞其好賓客琴書觴詠無虛日詩曰有斐君子如切如磋如琢如磨亦有從容於猗猗之間者乎噫郡之城於此者幾四百年矣其民令數十萬家所謂園池亭榭富者或過侈而貧者不能有也至於竹樹之植久遠者或日就翦伐而方興者晝夜之所息雨露之所養亦未必遽能有此也李氏之亭本諸其先之陰德續以其子孫之讀書賓客之來於斯者尚有以識之也哉

廣西都元帥章公平徭記

昔在

世祖皇帝神武不殺威加四海際天盤地日月所照莫不來歸混一以來嘉惠遐域慎牧守整軍旅隨其風俗皆有以遂其生養之道察其習氣之偏而齊之使不得妄作此至元之治所以無間然也地大物衆豐豫繁息而有司寢弛於無虞而慢暴之漸興矣桂林之所統踰絕高險外溥海岳幅員數千里山川鬱結瘴癘時起 朝廷寬其徭役簡其法令吏乎其地者秩優而俸厚蓋所以哀其遠而安其生者也而其俗之難制則固有之若所謂曰生徭曰熟徭曰撞人曰斂人之目皆強殲之標也曰谿曰洞曰源曰寨曰團曰隘之屬皆負固自保因以肆暴之所也然皆有血氣之親口體之欲苟得所養而安其所利其情狀可知也撫字以其方責厲以其義號令以其信堅甲利兵以臨之則悍然不顧勃然不遜者或

寡矣或者欺其遠弱而無告掎克殘忍之不厭是非不明而舉措顛倒以害其生以拂其性雖善良懦弱尤不免於動作况素不知教令者乎數十年來扇動弗息 朝廷未嘗不思所以理之奈何執事者之弗恪非常之賞昧於黷貨之欺而用否之差徒足以敗事而興誚經事酋卒所忌者制郡縣以扼其要害置廉吏能將以參錯其出入因其勇黠而用之官軍之脈絡貫通豪壯之心力効命陰謀無所容妄念不敢作又以忠信廉介之官蒞其上明耳目公賞罰而持久焉不知出此而屢失良計以勞我將帥士大夫於奔走勞苦可勝追悔乎

今上皇帝即位之明年爲元統二年相臣樞府用外省之列薦以勳州萬戶之鎮撫州者濟寧章公伯顏拜鎮國上將軍廣西宣慰使兼都元帥佩金虎符以總其軍是年冬十月徭

寇以其衆起賀州富川縣之境入其縣大掠其民公整軍以出湖廣行省右丞完澤帥湖廣之兵來督戰至軍而病以軍事屬公公軍逼賊擊破秀峰挑溪新田野猪等寨斬首二百級繼而右丞病卒公以隨省某處萬戶某處萬戶之軍以行公親臨陣射其旗頭一人賊二人奪其寨門連破小溪徭源等寨盡克之生擒其酋唐七二十一等六十一人斬首八十級寇勢未已據其山險連引數百里大掠賀之臨賀富川亦出道之求明江華公分調諸軍攻其要害擒斬二千九百六十七級復富川縣得邊蓬寨巡檢所失印招邑民還業是年潰寇又攻平樂府之攻城靜江之陽朔三年正月公救軍捕之湖廣平章探馬赤至軍公軍破寇所據月盧等一十二村獲賊一十七人又破涼涇源得賊一十一人又破大厚黃辛等一十二源擒斬一千八百九級仍改至元元年七月彙

兒只顏以湖廣參政兼都元帥來與公會捕破靈川縣境藍田米落等處潰徭之復聚者斬首三百級而公諭其酋潘光叔陸秀琳等來歸得戶百廿六大小九百八口歲願輸租三十餘石十月十九日擊臨桂縣慕化鄉之邊山慈洞斬首三級徭寇盡潰發其巢得偽鈔板印旗甲戈弩及所殺命官之袍笏得爲鄉導者龍表一等四十六人梟首以示斬餘寇八十餘級得脅從者男女四百三十人復其業十一月以詔書按兵而招之得義寧荔浦縣咸水等二十餘處酋潘三十一等金紫等二十一源酋俸傳四藤之岑溪縣酋沈明等濤賀等處酋李百七皆詣公降計其地凡一百七十八處戶八百八十一大小男女凡二千四百餘口公引大兵屯柳州謀報賊攻賓州公引兵出象州抵來賓縣二年正月十一日寇三千餘人據北三都公遣千戶王世英往敵之未接戰公帥

屯兵萬戶忽都答兒引兵至石橋與賊遇道隘賊據險戰不得地公引軍至五里塘成陣以待賊分三隊圍官軍公麾下射殺二人忽都答兒等射殺六人射殺突入者旗頭一人有賊挺身奮戈出當吾陣屯兵百戶陶庭蘭識之曰此首賊梁四也急擊之不可失官軍急擊之遂斬梁四及從之者六人賊少却保山頂下矢石以攻我軍公發火砲焚其寨軍士四面構緣以士連戰者三公手射者盡殫矢箠為空斬首八十九級擒其尤強悍者十七人賊潰二月四日追襲至賓州得常抗官軍者十二人斬首七級得上林縣尉所失印又殺世為徭鄉導者潘壽撞人從賊者韋明等二十六人皆梟之寇北三都之餘黨保巖洞以竄謀知其處擁草洞口焚之無得出者時暑水溢師還靜江九月公與省臣分道追寇十月十日抵慶遠知賊出海北之境引兵出橫州至欽之靈壁與省

臣之軍會攻賊賊潰又分公軍出永淳寧浦縣貴州擒六十一人斬首二十八級得所掠男女六十九人還其家十二月三日會省臣洪水埭渡江入慶遠大安定連擊中廓屯營盧村洞擒其酋盧權盧開斬首二級得所掠良民遣還其家十八日攻唐妙隱峒擒首賊唐公猛等二人唐遜等十人三年正月九日公分擊中廓洞賊乘高墜石擊官軍公遣兵出從間道上擒其酋譚公顯等七人斬首二十五級得所掠良民遣還其家鞠公顯問海北寇首所在公顯云韋千四在北江田巖洞從其言往擊之其山千仞壁立不可上寇又礮石毒矢雨下公購軍中作飛橋直抵其巢擁車積其洞口乘風焚之韋千四棄其眾走捕得之其洞火數日乃絕委積家屬殲焉又與省臣分擊上下廓蘇村潘村等寨日有斬獲道險糧運不得至採野菜以食與省臣引兵來賓州二月十一日有

詔亦以江西行省某官統某處萬戶兵平章忽都魯迷失海
牙總之湖廣之兵平章某總之兵既合兩平章議擇勝兵二
千萬戶三人以屬公公引兵擊古野古晚香洞擒八人斬首
三十五級行次賓州遷江縣得古香之餘黨十一人戮之督
州倅張宜子擒寇海北之餘黨潘千五等二十九人斬首二
級三月五日擒古香餘黨之酋梁七等二十二人初九日慶
遠民陳中達詣軍門言柳州皂嶺李全甫子姪僭稱王號執
我萬戶哈刺不花殺千戶乃蠻互流劫鄉村燒毀倉庫累降
復叛投充屯撞規伺兵機聞兩省合兵彼懼而逃去未易可
得禍未已也公素知李之橫如民言督千戶蔣元鳳誘之出
設伏擒之并李萬盛韋包弟又遣萬戶劉某與谷刺罕及願
自効之軍分捕其黨擒一百二十六人斬首三十二級十三
日還與兩平章會擊石山上錦黃峽水確滑石等寨擒一百

三十一人斬首七十四級公與平章議留兵守要害而息大
軍於嶺外公之威聲又著封部藉以少安矣公之同為帥者
某人某人相繼或除或代數年之間日夕軍務之勞則惟公
而已行省以公功言于朝者凡幾章省臣列奏公功
天子為遣使賜對衣尚尊以勞之所奏立功者大小凡幾人
命官有差仍命其子安因佩金虎符襲虜州萬戶鎮撫州行
御史臺用監察御史伯顏甄囊加互等奉道憲使郭某副使
某僉事某某上公實蹟凡幾章達于朝而朝廷信之所
部宜之譬諸嬰兒飢飽疾病未可以去其父母是以勉留之
而未亟遷也夫山川險要之利害幽阻深僻其人昔得為保
障今怙以作亂者形勢之所擊也以蠻夷攻蠻夷古之道也
藉撞人以制徐撞強而敗假融欵以制撞欵盛則又助叛者
此方略之所以存乎其人也官兵至則寇散匿漲潦侵則乘

險出不測此又天時之所致者也公於其所經行一水一石之委折無不密識之開轅門以延見四方之士無日暮皆得通謁無小大貴賤皆得以輸其情厚薄往來曲盡其善是以上下遠邇如指諸掌兵如烈火玉石俱焚重賞之下首虜或濫公則拳拳於被掠脅從之人而護之歸軍簿論功勢賄交患一失其當衆心解焉公則屹然不移惟是用所部歲當遷補擬注者常數百人皆當其任而無所私歲用糧三十餘萬石而不徒費此皆古昔良將之能事而公優爲之是以能致勝而持久也初廣右之師老益以荅刺罕之兵勇悍驍疾所至多克稍失其馭不無傷殘則欲請於上立部伍定爵秩嚴法令明紀律以當險要之衝焉慶遠深入南丹荒阻而延袤有罪亡命之徒潰散未絕之寇日增月益萃爲淵藪又欲置官府連營於其間以戍之使不得動作文書屢上朝廷

必將信用之爲無窮之利便者其在此矣予與公有一日之雅以予嘗忝國史也數錄其功多之目以相示集歷觀國初之位置中間之因循今日之攻守使後來有所規隨故爲作平徭記至正元年五月甲子前史官虞集記

道園學古錄卷之三十八

Large stylized watermark or seal, possibly containing the characters '西' (West) and '東' (East) in a circular arrangement.

Vertical columns of faint, illegible text or bleed-through from the reverse side of the page.



